

Communicaziun allas medias, 26 d'avost 2020

Surses 2030: igl process participativ per igl maletg directiv antscheva

Per igl cumegn gioven e grond da Surses è l'amprema perioda da legislatura alla fegn e cuncheigl sa posa la dumonda scu s'orientar strategicamaintg. Pertge s'angascha igl cumegn? Tge valours duessan neir sottastritgeidas e chegl antras tge maseiras, repectivamaintg scu duess chegl neir siero? Ansemen cun la populaziun vottan las autoritads communalas cattar las dretgas raspostas e sviluppar la veia digl futur.

Igl december passo è la suprastanza communal neida incumbensada antras ena moziun alla radunanza communal da sviluppar ansemen cun la populaziun igl maletg directiv digl cumegn. La suprastanza communal à surdo l'incumbensa dad iniziier ed accompagner chel process alla PROJEKT.BOX GmbH da Malans. Patric Collet, carschia se a Riom ed oz sesent a Coira, s'occupa digl project. Er involucadas èn seis ulteriouras persungas sot la direcziun da Linda Netzer, sviluppadra digl li. Chel gremi duess accompagner a moda critica e scu represchentants dalla populaziun chel process ed anritgier chel cun inputs. La responsabladad generala digl project ò la suprastanza communal.

Ena rolla impurtanta gioia la populaziun. Persungas indigenas e persungas cun sagond domicil duessan aver la pussebladad, dad influenzar la veia futura digl cumegn. Per chel scopo vignan igl ampren fatg intervistas cun experts dad otg camps tematics. Sa basond a chellas intervistas ò li en'infurmaziun cun luvratoris per la populaziun. Chegl ò li sonda, igls 31 d'otgover 2020 ainten la Sala Grava a Savognin. Siva d'aveir valetò igls resultats suonda en questiuari a moda online. L'antierra populaziun è anvidada dad amplaneir chel questiuari.

Digls inputs consolidos vign preschento da premaveira 2021 en maletg directiv pigl cumegn scu er en catalog da maseiras. Igl maletg directiv cumpeggia las valours, per las qualas igl cumegn da Surses s'angascha igl futur. Igl plan da maseiras dovra la suprastanza communal agl futur scu instrumaint da planisaziun dinamic.

Infurmaziuns: Leo Thomann, leo.thomann@surses.ch, 081 659 11 61

Legenda: project decisiv, segn veia da viandar cun vista vers Lunghin e Septimer

